



REPUBLIKA E SHQIPËRISE

KËSHILLI I MINISTRAVE

PROJEKTVENDIM

PËR

MIRATIMIN E PROCEDURAVE PËR KRYERJEN E
VEPRIMTARIVE TË SHFRYTËZIMIT NË FONDIN PYJOR KOMBËTAR NGA
INDIVIDË APO SUBJEKTE TË LICENSUARA

Në mbështetje të nenit 100, të Kushtetutës së Republikës së Shqipërisë, të pikës 3, të nenit 23, të ligjit nr.57/2020, "Për pyjet", me propozim të ministrit të Turizmit dhe Mjedisit, Këshilli i Ministrave,

VENDOSI:

KREU I

DISPOZITA TË PËRGJITHSHME

Neni 1

Qëllimi

Projektvendimi ka për qëllim të përcaktojë procedurat që ndiqen nga individët apo subjektet e licensuara, gjatë kryerjes së veprimtarive të shfrytëzimit në fondin pyjor kombëtar.

Neni 2

Përkufizime

Termet e përdorur në këtë vendim kanë të njëjtin kuptim me termat e ligjit nr. 57/2020 "Për pyjet", ndërsa termat e mëposhtëm kanë kuptimin si vijon:

1. "Veprimtari shfrytëzues në fondin pyjor kombëtar" janë punimet apo aktivitetet që kryejnë individët për nevojat vetjake apo subjektet e licensuar në fondin pyjor, të cilët kanë fituar të drejtën e shfrytëzimit sipas legjislacionit në fuqi, si më poshtë:
 - a) Punimet për shfrytëzimin e lëndës drusore dhe të asortimenteve;
 - b) Punimet dhe aktivitetet në infrastrukturën pyjore;
 - c) Punimet për prerjet kulturale;
 - d) Punimet për mbrojtjen e tokës pyjore.
 - e) Vlelja dhe grumbullimi i bimëve mjekësore, etetovajore e tanifere natyrore (BMET) dhe prodhimeve pyjore jodrusore;
 - f) Shërbime të tjera në fondin pyjor;

2. "Individ" ka kuptimin sipas pikës 22, të nenit 3, të ligjit nr. 57/2020 dhe ndjek procedurat e këtij vendimi vetëm në rastet e shfrytëzimit të fondit pyjor për nevojat e veta.
3. "Subjekt i licensuar", ka kuptimin e personit fizik dhe juridik që ka të drejtë të shfrytëzojë fondin pyjor kombëtar pasi të jetë pajisur me licencën përkatëse për ushtrimin e veprimtarisë sipas legjislacionit në fuqi për licencat, lejet dhe autorizimet.
4. "Transport i largët", është transporti i lëndës drusore nga sheshet e depozitimit drejt pikës së magazinimit apo shitjes.
5. "Sheshi i depozitimit", ka kuptimin e një vendi të caktuar brenda parcelës ose grup-parcelave të përcaktuara për shfrytëzim, ku depozitohet e stivohet lënda drusore pas përfundimit të transportit të brendshëm.
6. "Punimet për mbrojtjen e tokës pyjore" kanë kuptimin e kryerjes së pyllëzimit dhe të sistemeve malore.

KREU II

PROCEDURAT E KRYERJES SË VEPRIMTARIVE TË SHFYTËZIMIT

Neni 3

Procedura e shfrytëzimit të lëndës drusore dhe asortimenteve në fondin pyjor kombëtar

1. Individit apo subjektit i licensuar që zotëron të drejtën e shfrytëzimit i kërkon strukturës përgjegjëse për pyjet në bashki, projektin teknologjik të shfrytëzimit dhe lejen përkatëse të shfrytëzimit.
2. Struktura përgjegjëse për pyjet, brenda 10 ditëve nga administrimi i kërkesës, pajis me projektin teknologjik dhe lejen e shfrytëzimit individin apo subjektin e licensuar.
3. Struktura përgjegjëse për pyjet në bashki, brenda 5 ditëve nga vënia në dispozicion e projektit dhe lejes përkatëse të shfrytëzimit, i dorëzon individit apo subjektit të licensuar parcelën apo parcelat që janë objekt i shfrytëzimit.
4. Pas marrjes në dorëzim, individit apo subjektit i licensuar, në bashkëpunim me strukturën përgjegjëse si dhe në përputhje me afatet e parashikuara në kontratë, kryejnë procedurat e nevojshme si vijon:
 - a) përforcojnë me shenja të veçanta dhe të kuptueshme drurët e damkosur;
 - b) caktojnë vendet të cilat nevojiten për instalime të përkohshme në funksion të skemave teknologjike të shfrytëzimit, të tilla si skelat e ngarkimit, sheshet e depozitimit, etj.;
 - c) përcaktojnë një vend për ngritjen e kampingut të punëtorëve, në rastin kur lëvizja ditore e punëtorëve nga qendra e banuar në vendin e punës dhe anasjelltas, është e pamundur për shkaqe që lidhen me largësinë, etj.;
 - d) merr përsipër dorëzimin e vendit të kampingut të punëtorëve pas përfundimit të shfrytëzimeve, si në gjendjen fillestare të tij, pa mbetje dhe pa dëmtime;
 - e) brenda periudhës së shfrytëzimit të përcaktuar në lejen e shfrytëzimit, ka detyrimin e mbrojtjes së sipërfaqes pyjore në të cilën do të kryhet veprimtaria e lejuar, sipas përcaktimeve në kontratën e përbashkët me pronarin;
5. Në rastin kur në kontratë është përcaktuar që individit apo subjektit i licensuar të kryejë transportin e largët të lëndës drusore, i kërkon strukturës përgjegjëse për pyjet në bashki pajisjen me vërtetim transporti për përmbushjen e detyrimit kontraktor.

6. Vërtetimi i transportit plotësohet dhe lëshohet nga struktura përgjegjëse për pyjet në bashki në sheshin e depozitimit, pas kryerjes së matjeve përkatëse të lëndës drusore që do të transportohet.
7. Para kryerjes së transportit të largët të lëndës drusore nga sheshet e depozitimit apo skelat e ngarkimit, individi apo subjekti i licencuar, shënon lëndën drusore me bojë sipas ngjyrës së përcaktuar e të miratuar nga bashkia.

Neni 4

Procedura për kryerjen e punimeve dhe aktivitetet në infrastrukturën pyjore

1. Punimet dhe aktivitetet në infrastrukturën pyjore kryhen vetëm nga subjekte të licencuar.
2. Për punimet dhe aktivitetet në infrastrukturën pyjore, subjekti i licencuar, pasi ka lidhur kontratën përkatëse me bashkinë, në bashkëpunim me strukturën përgjegjëse në bashki, ndjek procedurën e mëposhtme:
 - a. I kërkon strukturës përgjegjëse në bashki, brenda 5 ditëve, ti dorëzojë subjektit të licencuar projektin përkatës, që do të zbatohet në infrastrukturën pyjore.
 - b. Shënojnë me shenja të qarta në terren, gjurmën mbi të cilën do të zbatohet projekti.
3. Në rast se gjatë zbatimit të projektit cënohet pylli (drurë apo grup drurësh), struktura përgjegjëse për pyjet merr masa për heqjen apo mbrojtjen e tyre.
 - a. Pas verifikimeve në terren, në vendin ku zbatohet projekti, struktura përgjegjëse për pyjet në bashki harton një raport teknik, i cili përmban volumet e lëndës drusore dhe vlerat financiare të saj dhe vijon me heqjen e drurëve.
 - b. Në rast se kostot financiare për heqjen e drurëve nuk janë parashikuar në projektin përkatës, struktura përgjegjëse për pyjet ndjek procedurat për heqjen e drurëve sipas akteve nënligjore në fuqi për pyjet.
 - c. Nëse volumi i drurëve që hiqen është më pak ose e barabartë me 50 m³ (metër kub), struktura përgjegjëse për pyjet në bashki ndjek procedurat për heqjen e tyre dhe brenda 5 ditëve, kryen njoftimin për:
 - i. strukturat përgjegjëse për pyjet në ministri;
 - ii. strukturat përgjegjëse të kontrollit në pyje.
 - d. Kur volumi i drurëve që hiqen është më i madh se 50 m³ (metër kub), kjo sasi trajtohet nga struktura përgjegjëse për pyjet sipas procedurës së miratimit të mundësisë vjetore të shfrytëzimit.
 - e. Pavarësisht procedurave të përcaktuara në gërmën "c" dhe "d", të pikës 3, të këtij neni, volumet e hequra janë në përputhje me mundësinë vjetore të shfrytëzimit dhe në asnjë rast ato nuk duhet ta tejkalojnë atë.
4. Në rastin kur, gjatë zbatimit të projektit bëhet i domosdoshëm transporti i largët i lëndës drusore, atëherë subjekti i licensuar i cili është kontraktuar për të kryer transportin e largët të lëndës drusore, kërkon nga struktura përgjegjëse për pyjet në bashki, pajisjen me vërtetim transporti.
5. Vërtetimi i transportit, plotësohet dhe lëshohet nga struktura përgjegjëse për pyjet në sheshin e depozitimit, pasi ka kryer matjet përkatëse të lëndës drusore që do të transportohet.

Neni 5

Procedura për kryerjen e punimeve për prerjet kulturale

1. Punimet për prerjet kulturele kryhen vetëm nga subjekte të licencuar.
2. Për punimet për prerjet kulturele, subjekti i licencuar, pasi ka lidhur kontratën përkatëse me bashkinë, në bashkëpunim me strukturën përgjegjëse në bashki, ndjek procedurën e mëposhtme:
 - a. I kërkon, strukturës përgjegjëse të pyjeve në bashki që, brenda 5 ditëve nga lidhja e kontratës, ta pajisë me projektin përkatës për punimet për prerjet kulturele dhe lejen përkatëse për këtë qëllim.
 - b. Shënojnë me shenja të qarta në terren sipërfaqen, mbi të cilën do të zbatohen prerjet kulturele, si dhe shënojnë me shenja të dallueshme të gjithë drurët që do të hiqen gjatë prerjeve kulturele.
3. Kur gjatë këtyre punimeve, rezultojnë të ketë asortimente të lëndës drusore të tilla si lëndë punimi apo dru zjarri, subjekti i licencuar i kërkon strukturës përgjegjëse për pyjet që të bëjë vlerësimin e saj, nëse një gjë e tillë nuk ka qenë e parashikuar në projekt.
4. Në rastin kur, gjatë zbatimit të projektit bëhet i domosdoshëm transporti i largët i lëndës drusore, atëherë subjekti i licencuar, i cili është kontraktuar për të kryer transportin e largët të lëndës drusore, kërkon nga struktura përgjegjëse për pyjet në bashki, që ta pajisë me vërtetim transporti.
5. Vërtetimi i transportit, plotësohet dhe lëshohet nga struktura përgjegjëse për pyjet në sheshin e depozitimit, pasi ka kryer matjet përkatëse të lëndës drusore që do të transportohet.
6. Brenda periudhës së përcaktuar në lejen për prerjet kulturele, subjekti i licencuar merr përsipër mbrojtjen e të gjithë sipërfaqes në të cilën kryen veprimtarinë e lejuar sipas përcaktimeve në kontratën e përbashkët me pronarin.
7. Pas përfundimit të punimeve, subjekti i licencuar i kërkon strukturës përgjegjëse për pyjet, vlerësimin e punimeve të kryera dhe dorëzimin e objektit.
8. Struktura përgjegjëse për pyjet, pas përfundimit të punimeve, brenda 15 ditësh merr në dorëzim objektin, duke analizuar, vlerësuar dhe konstatuar mbi bazën e provave administrative, që punimet janë kryer në përputhje me projektin teknik.
9. Procedura e dorëzimit të objektit nga ana e subjektit dhe ajo e marrjes në dorëzim të tij nga struktura përgjegjëse për pyjet, shënohen në procesverbalin e dorëzimit.

Neni 6

Procedura për kryerjen e punimeve për mbrojtjen e tokës pyjore

1. Punimet për mbrojtjen e tokës pyjore kryhen vetëm nga subjekte të licencuar.
2. Për punimet për mbrojtjen e tokës, subjekti i licencuar, pasi ka lidhur kontratën përkatëse me bashkinë, në bashkëpunim me strukturën përgjegjëse në bashki, ndjek procedurën e mëposhtme:
 - a. I kërkon strukturës përgjegjëse për pyjet në bashki, që, brenda 5 ditëve nga lidhja e kontratës, ta pajisë me projektin përkatës për punimet për mbrojtjen e tokës pyjore dhe me lejen përkatëse për këtë qëllim.
 - b. Struktura përgjegjëse për pyjet kryen shënjinin e qartë në terren të sipërfaqes mbi të cilën do të zbatohet projekti.
3. Në rastin e punimeve për sistemimet malore, struktura përgjegjëse për pyjet përcakton rrugët për transportin e lëndëve të para që nevojiten për ndërtim, veçanërisht në rastin kur transporti kryhet me kafshë dhe kalon përmes sipërfaqeve të pyllëzuara.

4. Pas përfundimit të punimeve, subjekti i licencuar i kërkon strukturës përgjegjëse për pyjet, që të vlerësojë punimet e kryera dhe të dorëzojë objektin.
5. Struktura përgjegjëse për pyjet, pas përfundimit të punimeve, brenda 15 ditësh merr në dorëzim objektin, duke analizuar, vlerësuar dhe konstatuar mbi bazën e provave administrative, që punimet janë kryer në përputhje me projektin teknik.
6. Procedura e dorëzimit të sipërfaqes pyjore nga subjekti i licencuar dhe ato të marrjes në dorëzim të tij nga ana e strukturës përgjegjëse për pyjet, shënohen në procesverbalin e dorëzimit.

Neni 7

Procedura për vjeljen dhe grumbullimin e bimëve mjekësore, etetovajore e tanifere natyrore (BMET) dhe prodhimeve pyjore jodrusore

1. Punimet për vjeljen dhe grumbullimi i bimëve mjekësore, etetovajore e tanifere natyrore dhe prodhimeve pyjore jodrusore (këtu e më poshtë BMET), kryhen nga individë apo subjekte të licencuar.
2. Për BMET-t, individi apo subjekti i licencuar, pasi ka lidhur kontratën përkatëse me bashkinë dhe është pajisur me lejen përkatëse, në bashkëpunim me strukturën përgjegjëse në bashki, ndjek procedurën e mëposhtme:
 - a. Pajiset nga bashkia brenda 5 ditëve nga data e depozitimit të kërkesës me projektin përkatës për vjeljen dhe grumbullimin e BMET-ve dhe prodhimeve pyjore jodrusore dhe me lejen përkatëse.
 - b. Struktura përgjegjëse për pyjet në bashki bën shënjimin e qartë në terren të sipërfaqes mbi të cilën do të zbatohet projekti.
3. Në rastin kur, gjatë zbatimit të projektit bëhet i domosdoshëm transporti i largët i prodhimeve të dyta, atëherë individi apo subjekti i licencuar kërkon nga struktura përgjegjëse për pyjet në bashki, pajisjen me vërtetim transporti.
4. Vërtetimi i transportit, plotësohet dhe lëshohet nga struktura përgjegjëse për pyjet në vendin e depozitimit, pasi ka kryer vlerësimet përkatëse të BMET-ve dhe prodhimeve pyjore jodrusore që do të transportohen.
5. Brenda periudhës së përcaktuar në lejen përkatëse, subjekti i licencuar merr përsipër mbrojtjen e të gjithë sipërfaqes në të cilën kryen veprimtarinë e lejuar, sipas përcaktimit në kontratën e përbashkët me pronarin.
6. Pas përfundimit të punimeve, subjekti i licencuar i kërkon strukturës përgjegjëse për pyjet, që të vlerësojë kryerjen e veprimtarisë së BMET-ve dhe të prodhimeve pyjore jodrusore dhe të dorëzojë sipërfaqen e shfrytëzuar pyjore.
7. Struktura përgjegjëse për pyjet, pas përfundimit të punimeve, brenda 15 ditësh merr në dorëzim objektin, duke analizuar, vlerësuar dhe konstatuar mbi bazën e provave administrative, që punimet janë kryer në përputhje me projektin teknik.
8. Procedura e dorëzimit të sipërfaqes pyjore nga subjekti i licencuar dhe ato të marrjes në dorëzim të tij nga ana e strukturës përgjegjëse për pyjet, shënohen në procesverbalin e dorëzimit.
9. Me kërkesë të subjektit, struktura përgjegjëse për pyjet brenda 15 ditëve, lëshon certifikatën e origjinës për BMET-t dhe prodhimet pyjore jodrusore.

Neni 8

Dispozita të fundit

1. Ngarkohen Ministria e Turizmit dhe Mjedisit, Agjencia Kombëtare e Pyjeve dhe bashkitë për zbatimin e këtij vendimi.
2. Ky vendim hyn në fuqi pas botimit në Fletoren Zyrtare.

KRYEMINISTRI

Edi Rama